

LA QUOTIDIANA

FMR Fundaziun Medias Rumantschas, Via da Masans 2, 7000 Cuiria, 081 544 89 11, redacziun@fmr.ch



La lètg per tuts – il per e cunter

Ils 26 da settember vuscha il suveran davart maridaglias per pèrs omosexuels. Ina survista d'arguments. [Pagina 2](#)



La halla da chavaltgar – il per e cunter

A San Murezzan dat da discutir l'avegnir da la halla da chavaltgar che ristga dad ir en muschna. [Pagina 7](#)

FMR FUNDAZIUN
MEDIAS
RUMANTSCHAS

südostschweiz

ENGIADINA

Qualitats d'una bella cuntrada

Las personas chi fan la spassegiada da Vnà a Tschlin o viceversa sun invidadas da respunder las dumondas dal questunari «Inscunter». Tanter oter pona indichar che ch'una bella cuntrada stess avair a lur avis. Quist questunari fa part al proget «Inscunter» da la Pro Terra Engiadina chi realisescha quel insembel cun l'institut scientific federal God, naiv e cuntrada (tud. WSL). Respunsabla per quist proget es qua *Lina Torregroza*. In mardi ha ella fat la gita da Vnà a Tschlin cun una buna dunzaina da studentas e students. Sco ch'ella ha dit, scrivan las futuras geografas e geografis minchün che chi pensan dal questunari. «Uschea vezzaina schi's pudess til optimar amo», ha dit la scienziada. (fmr/fa) [Pagina 7](#)

SURSELVA

Pli e pli datier dils meglers



Vital Albin separticipescha regularmein al Cup mundial. FOTO MAD

La stagiun da bike va plaun a plaun a fin e cun ella era las grondas concurrenzas internaziunalas da cross country. La fin da quest'jamna vegnan las davosas cuorsas dil Cup mundial absolvidas els Stadis Uni dall'America. Sper *Nino Schurter* e *Mathias Flückiger* sco era ulteriurs Svizzers ei era *Vital Albin* (23) alla partenza. Il cyclist ch'ei carschius si a Tersnaus en Val Lumnezia ha contonschiu questa stad ellas cuorsas dil Cup mundial regularmein rangs denter ils 25 e 33 meglers. Sia finamira per la davosa cuorsa e surtut era pigl onn vegnent ei da serangar denter ils meglers 20 dil mund. Per contonscher quei scopo lavura el consequentamein vid ils detalgs. «Jeu hai aunc potenzial da migliur en pli u meins tuts graus, seigi cundizium sco tecnica», di Vital Albin enviers la FMR. (fmr/hh) [Pagina 3](#)

GRISCHUN CENTRAL

Igl poet e las chistas

Siva dalla mort digl poet *Gian Gianett Cloetta* da Barvogn igl onn 1965 è ena gronda part digl sies relasch svania ainten chistas da meila. El vala scu promotour e cumbattant digl bargunseifer, igl rumantsch da Barvogn. Ossa – 56 onns pi tard – ò l'autoura *Antonia Bertschinger* piglia per mangs igl relasch. Ella ò sortia, catalogiso e per part scanno las ovras digl poet da Barvogn. La FMR ò discurrenza cun l'autoura davart en relasch plagn surpresas. (fmr/sab) [Pagina 8](#)

Il luf ella greppa dalla Val Frisal

Las pastiras dalla alp da nuorsas da Breil ein circumdadas da spundas greppusas e sesanflan dalla vart seniastra dalla Val Frisal. Malgrad las seivs da protecziun ha il luf anflau duront la stad ina via tras la greppa per contonscher las nuorsas.

ANDREAS CADONAU/FMR

Faschas e Zanins senumnan las duas pastiras dalla alp da nuorsas da Breil. Ellas sesanflan ella spunda greppusa dalla vart seniastra dalla Val Frisal ed ein buca bein contonschiblas. In adattau liug per proteger ina muntanera da nuorsas dad attaccas dil luf. Da quei meini ein probabel era ils possessurs dallas 285 nuorsas stai che han segirau ils access ell'alp cun seivs da protecziun. Gidau ha ei la fin finala pauc. Il luf ha anflau la via tras la greppa per contonscher la muntanera e quei pliranga. Il post dil fatg per la protecziun da mun-

«Nus havein furau ruosnas el grep per francar la seiv da protecziun»

Marcel Albin, cauteigia

taneras dil Plantahof ei staus el liug ed attribuescha als purs d'haver fatg il pusseivel per proteger las nuorsas e d'haver agiu ad uras. Grond spazi per augmentar la protecziun dalla muntanera vesa il post dil fatg buca. Il secuntener dil luf ella Val Frisal ei, tenor las personas dil fatg, in mussament con spert ch'ils lufs emprendan da s'adattar a novas situaziuns e d'untgir ni surmuntar la protecziun dalla muntanera. Ed aunc in'otra causa ei tenor il post dil fatg buca da dubitar. Il luf tuorna igl onn proxim segir dalla spunda greppusa dalla Val Frisal siado. [Pagina 3](#)

«Cun jasters discuur'ins doch Deutsch!»

Annatina Foppa davart ils «secundos» rumantschs e tge che quels pudessan empernder dals segundos dal Balcan. – Pagina 12




FOTO AUGUSTIN BEEL

In meander sil Crap Sogn Gion

Quest'jamna ein *Yvonne Gienal* e *Luis Coray* vidlunder da preparar l'exposiziun «Mescal & Margriata» sil Crap Sogn Gion. Igl ei ina intervenziun cun nov objects. Ils dus artists collavuran cun *Remo Arpagaus*. Il scenograf ha fatg aposta in object che dat en egl a mintga persona che arriva culla pendiculara sil cuolm. Il meander ei in ornament che renda attent alla cultura greca. Surpreudentamein ha quella connex culla figura mitologica retoromontscha da sontga Margriata. (fmr/abc) [Pagina 5](#)



40037



Servetsch d'abunents e da
distribuziun: tel. 0844 226 226
mail: abo@somedia.ch

9 771424 749004